

Q. D. B. V.

25

EXERCITATIO ACADEMICA  
DE

GELATINIS,

QUAM

FAVENTE DEO,

CONSENTIENTE GRATIOSA FACULTATE  
MEDICA,

PRÆSIDE

ALEXANDRO CAME-  
RARIO,

MEDIC. DOCT. ET PROFESS.  
ORDINARIO,

PLACIDO COMMILITONUM EXAMINI  
SUBMITTIT

CHRISTOPH. FRID. SCHNEPFFIUS,  
STUTGARDIANUS.

AD D. SEPT. ANN. MDCCXXV.

HOR. LOC. CONS.

---

TUBINGÆ.

Typis JOH. CONR. REISH VIDUÆ

St. Gmelin



V I R O

*ILLUSTRI et EXCELLENTISSIMO,*

DOMINO

JOHANNI CONRADO  
HELWERO,

SERENISSIMI WURTEMBERGIÆ DUCIS  
CONSILIARIO REGIMINIS SENIORI,  
CONSILII TUTELARIS PRÆSIDI

*NEC NON*

SUPREMI DICASTERII ASSESSORI. Rel.

JCTO CONSUMMATISSIMO,  
MULTORUMQUE IN PATRIAM MERITORUM  
GLORIA PERINCLYTO

*DOMINO SUO EVERGETÆ, PATRONO ATQUE COGNATO*

PER OMNEM ÆTATEM PARENTIS AD INSTAR  
COLENDISSIMO,

PRÆSENS EXERCITIUM ACADEMICUM

IN ULTERIOREM PATROCINII SPEM,  
CUM VOTO PRO FELICITATE OMNIGENA,  
SUBMISSA CUM VENERATIONE  
OFFERT & DEDICAT

CLIENS DEVOTISSIMUS  
CHRISTOPH. FRID. SCHNEPFF.





Σὺν Θεῷ.



**A**cademiâ patriâ ad exteras discessuro, Mecænatibus autem & Parentibus studiorum specimen relicturo mihi opportunè succurrit, Statuta Collegii Martiniani ab alumnis suis istud exercitii genus postulare. Quò minus ergò temeritatis & audaciæ accusari possum, qui auctoritatem ita publicam habeo, quâ me tuear; Eò magis gratum B. L. spero fore thema meum, disputationibus academicis, quantum mihi constat, necdum adeò frequenter, ut fieri quidem cum aliis ferè solet, repetitum. Primò equidem, fateor, huic ipsi instituto minus convenire videbatur, tanquam non satis controversum: Verùm enim verò plures in progressu inter elaborandum deprehendi difficultates, quàm quibus expediendis me parem confidam. *Itaque ad Fontem Salutis aspirare non desinam, undè vires animo accedant & corpori, tam Medico necessaria, quàm agro utiles. Juva Jehova!*

**G**elatina vox est officinarum, non Latii; dixit Ol. Borrichius in ling. Pharmac. An igitur rectius, quibus vocabulum *Gelu* in usu est? Scilicet & Latini tales & Galli ad qualemcunque istam similitudinem respexerunt, quâ  
A 2
glaciem



glaciem utcunque referunt conereta istiusmodi juscula, unde etiam horum *Gelée*. Unde verò synonymum *Galreda*? Et in vernacula *die Sulzen*, insulsæ utique, sale tamen chymico benè fœcundæ? Talia docebunt, qui linguarum scrutantur origines. Illud modò quæri posset: An rem ignorarint, cuius nomen non habuerunt, Veteres? quod tamen vix videtur; Nam præter jura carniū, garon piscium, varia etiam noverunt conficere glutina. Nihilominus apud Dioscoridem, reliquosque materiæ medicæ Scriptores, utut prolixos de præparationibus animalium ad usus medicos, ossium tamen cornuumque gluten non invenio: Peculiare caput extat apud illum de cervino cornu, in quo nil quidquam de gelatinâ ejus. Vapulant etiam apud Zwelferum & Charas veteres, quòd pro theriacâ paraturi trochiscos viperarum, carnem coctam servaverint, jusculum effuderint, gelatinosæ virtutis vel ignari, vel incurii. Nec fortè olim Chymici ossa per aquam aut vaporem gelatinâ privata philosophicè vel hermeticè præparari vel calcinari dixissent, quod prædicatum hodiè ita exhibilant, si vulgo nota æquè tunc fuisset, ac nunc est, gelatina.

II. Innotuit ipsis diversa utique *Colla* græcorum, latinorum *Gluten*, non modò mineralis *Chrysocolla*, s. borrax, necdum satis nota, s. electrum, ferruminando auro conveniens, sed etiam vegetabilis *Sarcocolla*, quæ carnes saucias conglutinet, sicuti glutinum ligna, imò animalis *Ichthyocolla*, *Taurocolla*, ex ventre piscis, corio bovis excocta, à lignis, quibus glutinandis destinatur, *Xylocolla* dicta. Gelatina autem quid est aliud, quàm gluten in fieri; & habet omninò in vel ex vegetabilibus prolixam substantiarum convenientiam. Præter *mucilaginem* ex cortice, non germine, quorundam seminum, & species illas præcipuas notasque *gummi* tragacanthæ & arabicum, item *viscum* ex cortice aquifolii, modo apud Rajum in hist. plant. descripto,



descripto, parandum, & *glutinum aucuparium* ex visci baccis, de quo prolixus Matthiolus, aut *symphytum* fauces præcludens, aceto liberandas; præter etiam *gelatinam* illam *juniperi*, & simile mucosum *meteorum* stellarum cadentium, quod Plinio saliva siderum, aliis cœli flos aut cœlifolium, Paracelso nostoch vocatur, de quibus Cnœffelius & Menzelius in E. N. C. Ann. 7. app. & Dec. II. A. 9. præter, inquam, talia multa prostant in officinis *electuaria lucida*, e. g. diacydonion, diaribium, ex pomis item, rubi idæi baccis, prunis & similibus fructibus, cum saccharo parari solita, quæ à quibusdam sub eodem gelatinæ titulo comprehenduntur, eodem nomine veniunt. Has modò seponam, quia suppetit abundè ex animalium gelatinis, quod has pagellas repleat. Nec harum formulas describam, aut omnem ipsarum pharmaciam proponam, quippe quam norunt commilitones obviam in scriptis Celebb. *Schræderi*, *Mæbii*, *Wedelii*, &c. Sed excerpam modò theses, occasione causarum & facultatum ipsis attributarum, miscellaneas.

III. Fundamenta virtutis & usûs, unde rationes effectuum dari possint, sunt duo illa artis nostræ principia, ratio & experientia, tam propria quàm aliena. Primo igitur loco stant *manifestæ* gelatarum *qualitates*, insipiditas, lenitas, solubilitas, visciditas, vi quarum spectant ad censum medicamentorum temperatorum & temperantium calorem atque siccitatem; humectant, diluunt, alterandæ etiam ad refrigerandum fortiùs, opponendæ aut convenientes acrimoniæ, tenuitati, strictioni, denudationi, quia involvunt, inerasant, relaxant, emolliunt, demulcent, oblinunt. Sic declaratâ benignâ earum naturâ, esui usuique medico aptâ, cibum obtineri speramus, qui nec qualitate adversâ fastidiosum stomachum offendit, nec languidum gravat, aut infirmo resistit, quin etiam à debili conficitur, & promovetur,



per vias chyli quò debet porrò deducendus. Respectu verò partium nutriendarum , non modò substantiam ipsarum non absumit , verùm etiam quæ rapiunt particulas deprædatrices involvit , motumque fortiozem temperat , imò aptam pro restauratione deperditi materiam constituit , ita quantitatis & qualitatis vitio prospiciens. Firmat hæc facultates beneficas origo animalis , & obvia cum succo nostro nutritio convenientia. Valet enim hîc , quod dicitur : Nos talibus conservari & nutriri , qualibus constamus. Analogiam offert humorum pulcherrimus , crystallinus , siccandus tamen in crustulas. Ex ipso sanguine parandi gelatinam modum docet *Kœnig* in regn. anim. cujus in sanguine , non hujus , defectum inveniri ajunt in animalibus fame enectis. Ita vi caloris concrescit lymphæ nostræ : Non dum ita serum lactis ; Non amplius serum urinosum ; Aliter etiam pituita vel mucus hinc inde exsudat è glandulosis tunicis , quàm hæc veterum vel pituita naturalis , vel ros , aut gluten. Talis itaque substantia , cùm non violenter , sed adeò facilè , simplici caloris humidi vi , nimirum lentâ coctione in aquâ , obtineatur communiter & largiter ex durâ solidâque corporis animalis compage , hinc à *Papino* voluit haberi pro qs. cæmento naturæ , quo jungat particulas terreas ; imò pro criterio vitæ diversimodè durabilis per animalium species , ad clariores fortè causas reducendæ , si quis differentias gelatinarum in quantitate & qualitate per diversas eorum species , ætates , & partes prosequeretur exactiùs. Scilicet in genere quidem largus ille proventus gelatinæ satis notus est , natura autem ipsius & differentiæ non item. Undè etiam in desideratis est apud *Stahlianum* in *Zymotechn.* historia glutinum , è quibus tamen totum animal constat. Quomodo autem ipsum gluten , seu mixtura talis è sale , terrâ & oleo , variâ proportionem & tenuitate unitis fiat , cujus princi-



principii artificium vel effectus sit ? hoc determinabunt Philosophi. Vix equidem aliud, quàm quod vel materiam pro singulis speciebus & partibus format, vel elementa specificè miscet. Ex aquâ constare omnia voluit *Helmontius*, prætendens etiam mucilagines seminum connubio inspissatas, & è corpore suo resolutas, fieri glutina, gummi, collas : Et illi præposuit semen, fermentum, multiplicationis & mutationis principium. Modò processum liceret capere, credere non foret opus. Indè verò sunt tales substantiæ inimitabiles, non producibiles per mixtionem vel elementorum Aristotelicorum, vel principiorum Hermeticorum. Cui secus videtur, butyrum sine lacte, coria sine pellibus conficiat, ad scemma Curiosus Anglorum primitus objectum.

IV. Alterum principium gelatarum ægris proficuarum venit ex laboratoriis chymicorum, scilicet unde & salia & spiritus cornu cervi & eboris, similesque prodierunt. Extrahit aqua, simplex illud menstruum, simplici etiam operatione, cum & in gelatinis ex ossibus & cornibus futuram materiam *salis volatilis*, cujus copia tanta provenit ex toto regno animali, quâ separatâ relinquitur calx sive terra, aut caput mortuum, illo principio destitutum, cum tamen ex gelatinâ per retortam destillatione obtineatur largiter. Scilicet tum aduri ipsam necesse est, aut aliàs putrefieri prius, quàm se manifestet salis urinosi forma. Chymicorum esto, determinare modum specialem hujus vel analyseos, vel syntheseos, aut geneseos : An præexistat ibi tale sal, sed occultatum, ad instar gladii in vaginâ reconditi; an noviter producat ab igne, per materiæ novam figurationem, vel novam particularum mixtionem. Omne distillatum, inquit *Helmontius in ad. præcl. ad cond.* est nova creatura, per ignem producta; adeoque non ex primo sui concreti instituto. Quicquid per ignem prodit, etsi sit naturale, profluit tamen è principio



principio naturæ obliquo ; feminalia initia detorquente ad ignis lubitum. Hinc quicquid per ignem conficitur , vitam primam , mediam atque ultimam simul acquirit , liquanturque simul junctim. &c. Decocta autem non sunt entia , qualia per distillationem proliciuntur , sed tantum translationes unius entis in medium sibi peregrinum. „ Quicquid hujus sit , medico certè sensu & usu corpus nostrum mox in primo limine testatur se aliter affici , & fortiter nimis percelli à sale hoc , quàm ejus gelatinâ ; adde oleum empyreumaticum , foetidum , sine quo non obtinetur sal adeò alienum , & discrimen erit clarius. Recondidit natura in vegetabilibus inflammabilem , in animalibus urinosum spiritum , nec ita voluit manifestum ; pro usu tamen corporis humani vim demonstrat eruendi , resolvendi & applicandi , quod sibi necessarium & utile. Remotius ergò hæc foetura salina & sulphurea erit principium.

V. Tertiò , gelatinæ commendari solent tanquam *specificorum* quorundam remediorum quinta essentia. - Trium autem modorum agendi s. specificè alterandi , evacuandi , confortandi applicantur singuli. Sunt *alexipharmaca* , cervina , viperina , &c. conditioni materiæ peccantis malignæ opponi solita ; sunt *antispasmodica* eadem , ebur , unicornu , &c. quæ nervinorum in censu eminent ; Sunt *diaphoretica* , cùm eorum pleraque promoveant diapnoen. Nisi quòd & primum modum per manifestas qualitates explicet *Screta* , scilicet malignarum virus glutini seu visco inhærescere , spicula corrodentis salis involvi cornibus , ossibus , dentibus , & ex quibus gelatum jus excoqui potest. Illæ autem tertiæ , olim occultæ , qualitates vix possunt hîc transmitti sine dubio : Cùm enim controversum sit , an & quantum specificæ talium animalium vires conveniant & differant , non poterit non ad eorum usque gelatinas dubium se extendere. An præter hæc istorum



istorum vires sint integrorum, an etiam exindè præparatorum, si non omnium, tamen adhuc integritati propinquorum? Scilicet ut de vitâ mediâ Helmontii quid supersit, qui periaptalia ossæ & cornea proponit, & amuleti vim influentiæ directivam, citra evaporationem, assignat. Res per exempla erit clarior: An cornu cervinum ebori vel unicornu sit æquivalens antispasmodicum? An gelatina pedum vituli par sit viribus cervinæ; eboraceæ? An, cùm suppetat ichthyocola, carere & supersedere possimus illis omnibus? Hæc talia ego quidem commendo prolixæ *medicinae tentativæ*, seu examini materiæ medicæ rigorofo.

VI. Ex prætensâ verò facultate specificâ fuit specialior quarundam gelatinarum usus, cui quidam multum tribuunt, alii parum, vel nihil: Imò sunt ex eis, quas cum horrore nonnulli averfantur, alii haberent tanquam indifferens, modò non dubitandum ipsis videretur de successu. Ex. gr. *Hartmannus* contra podagram commendat in cibo *galredam ossium humanorum*. Tales autem anthropophagos exagitarunt olim Ludovici & Rivinus. Externè ex aliis ossibus parant alii epithema podagricis, quale describitur in *Thes. Secr. Cur.* Similis est ratio partium genitalium, è quibus e. gr. taurorum gluten confici jam olim monuit Plinius; Nam *cervi* (non præcisè in coitu transfossi) atque *ceti priapus* laudantur e. g. ab *Etmüllero* ad dysenteriam, si non à virtute specificâ, tamen ob glutinosam substantiam. Sed hæc iterum virgulam merentur censorum istorum materiæ medicæ. Non minus perstringuntur *viperæ*, quia inter illa animalia, quæ dum vivunt venenata sunt & nobis exosa, nec post mortem arefacta, oculis, naribus aut linguæ arridere possunt. Nihilominus frequens est earum apud Italos usus; unde missis aliis allegabo saltem *Lancisium*, qui non modò inter cardiaca & alimenta optimi succi retulit jura viperata, sed & Ipse ejus usu (post rhabarbarum & chalybem) convaluit, cùm longâ cor-



dis contractionē , & pulsûs intermittentiâ laborasset. An ergo præ spinis & carnibus convenientior earum *gelatina* , quæ vel Magnatibus celebrari solet ? An contra sui generis venenum tantum potest curatorie , quantum ille pulvis , qui à prætensâ hâc virtute *bezoardicum* vocatur *animale* ? Hoc enim Ludovici ipsi adhuc reliquit , qui tamen conqueritur , quòd medicum in extremè malignis , imò simpliciter intermittentibus , destituat , in inveteratâ pсорâ & leprosis dispositionibus parum juverit , sæpe cutaneos ardores potius intendisse visus. Non prosequar ulterius differentias hæcæ specificas , unde quæstiones plures paradoxæ possent exsurgere ; An e. g. *Judeus plenriticus* , si non pro cibo , fortè tamen pro remedio admitteret , quam Etmüllerus laudat , *gelatinam dentis apri* ? An *Pythagoricus* , mundam sine carne cœnam affectabundus , *gelatinam cornuum* , quæ sponte *cervo* cadunt , excluderet ? &c. Sed simpliciter innuam , mihi simplicitatem placere , & cornu cervi atque ebur sufficere.

VII. *Ludovicus* non vult *siccari* gelatinam , alutariorum more , quia vix sine glutinis fœtore id fieri queat. *Wedelius* d. med. comp. ext. Gelatinæ , inquit , *exsiccatae* & *pulverisate* , viscosæ , picæ , quasi minus bonæ , undè non facile in usum trahendæ , lædunt enim ventriculum. Et in Pharmac. à magnâ admodum quantitate gelatinæ , propinatâ Illustr. puer variolis decumbenti , vomitus ante mortem nigricantes ferè , & colore æmulantes gelatinam , occasionem dederunt Laud. Viro monendi , ne præbeantur illæ vetustæ , ingrati ac putidi saporis , vel nigræ , opacæ , duræ , cornu referentes , stomacho maximè ingratae & infaustæ. Utique jam olim *Plinius* gluten , quò candidius , eò probatius dixit , nigrum & lignosum damnavit. Scil. adulterari etiam observavit quibusve pellibus inveteratis , calceamentisque etiam decoctis. Siccandæ autem viderentur gelatinæ , quia non durabiles , in-

primis



primis æstate ; quia tamen adeò facilè parabiles , minus erit opus istis. Ego quidem humidam recentem toties expertus , siccam nuper naribus & ore modò examinavi , & non adversam , inodoram ac insipidam deprehendi , nisi ipsum viscosum ipsius proprium saporem velis dicere , fatuum cæteroquin gluten sensus non ferit. Ne verò per negligentiam , dum siccantur gelatinæ , adurantur & empyrevma contrahant , cautu non erit difficile. Prostat in officinis , præter siccam cervinam , talis quoque *composita* , scil. obtenta ex rhinocer. unicornu , alcis , eboris , &c. philosophicâ præparatione ; ne quid pereat. Cujus usus & per se non est infrequens , scil. in fervido jusculo ex tempore solvendæ , & per accidens quoque famosus , nim. tanquam medii pro colligendis in pilulas aut trochiscos pulveribus : Ita Cephalicus , quem reliquit *Præsidis B. Avus* redigitur in pilulas pro iis , qui pulveris formam non amant ; *Zwelferus* bolum armenam , cornu cervi ustum & philosophicè calcinatum , cranium humanum , aprorum dentes , suum item pulverem cervinum & viperinum , vel decocto cervi & viperarum præparat , vel gelatinâ imbuit , viribus ita propriis seu humiditate suâ radicali iterum insuecat. Et hoc respectu ad specificas talium vires mucilagini gummi tragacanthæ , ordinario pulverum vinculo , gelatinas illas prætulerunt multi. *Riverius* trochiscos alexipharmacos , *Cnæffelius* suos alexipharmacos viperinos , venerem confortantes , lapides serpentinos , antepilepticum solare , lunare , *Fullerus* lapidem alexiterium , &c. ita parat ; pulverem cantianum quoque cum gelatinâ viperarum in trochiscis exhibet *Thef. Secr. Cur.*

VIII. Dum coquitur gelatina & exsiccatur , si quis vel nihil velit perdere , vel *captare* speret cum aquâ nescio quid vel nutritium vel alterans , per me licet colligat *vaporem* imposito alembico. *Papinus* , qui gelatinosum non esse eva-  
B 2
porabile



porabile monuerat , documento utique gelatarum siccarum , postmodum tamen sibi visus est obtinuisse in vase suo clauso gelatinas sapidiores , ut suspicatus fuerit , communi modo perdi quid volatile. *Mynsichtus* dedit aquas pulmonum vituli , caponis , antiphthisicam , imò de cornu cervino destillatam , alii similes , ut in citato remediorum selectu & Thes. Secr. Cur. ex capo , ex gelatinis , jusculis consumm. succis herbarum & fructuum ad renum & vesicæ vitia. De talibus notum est illud *Ludovici* : Teneriorum aliquos è tabidis , squalentes arentesque ( per actualement frigiditatem , aut accessoriorum fragrantiam , destinationemve pectoralem ) aliquantum adhuc refocillatos vidimus , restitutum verò neminem. Vel , si placet , illud *Zwelferi* : Sani carne & pane , à morbo debilitati jusculo & gelatinâ vescemur , spreto vapore. Item : omisâ aquâ caponis compositâ , vel omisso in destillando balsamo embryonis capone , gelatinam ipsius uno & altero cochleari aquæ destillatæ aromaticæ generosæ dilutam prægnanti exhibendam.

IX. *Boyleus* & *Papinus* valî cochleâ obturato , in *maria balneo* pariter cochleâ firmato , inclusas duriores carnes percoquere , ossibus etiam maximè talibus gelatinam extrahere , cum didicissent , novæ hujus digestionis modum & organon ulterius extendere , navigantibus inprimis commendare sunt aggressi , monstrantes hinc parsimoniam ligni s. ignis & aquæ , paucis carbonibus , brevi tempore , in majori copia obtinendam gelatinam , indè bonum hoc nutrimentum , quod simul humorum acrimoniam , ex sale conditis & fumo induratis carnibus contractam , corrigat. Philosophis compressi æris & aquæ , dum igne aguntur , tanta vis expendenda relinquitur. Pro medico gelatarum usu inter nos digestore illo novo nondum fuit opus , sub vili cornu cervi pretio , sub facile parabili rasurâ eboris , ne de vitulorum pedibus quid dicam;



cam ; Nisi fortè penuria lignorum nostrates olim quoque monuerit cogitare de talibus compendiis , aut evolvere die *holzspahr - kunst Glauberi* ; nam multo ligno opus est , dum foeminæ caponum illam galredam in vase stanneo per cochleatum operculum clauso excoquunt , edoctæ procul dubio ut Papinus à chymicis per analogiam mariæ balnei.

X. *P. Lana in mag. nat. & art. t. 2. l. 1.* artificium hoc proponit : Ossa, ebur, & simil. ut mollescant, coloribus omnigenis imbuantur , & in quamlibet formam fingantur. Scilicet digestionem ipsorum in *aceto destillato*. In manuali primo *Paracelsi* præter acetum etiam *lixivium* destinatur emollitioni ossium. *Schræderus* quoque acetum commendavit ad promovendas è durioribus ossibus gelatinas. Inter mangonia ebur aquâ forti excavari , aliterve fingi, *Ludovicus* monuit. *Papinus* autem ebur , utut coctum in oleo , cerevisiâ , aquâ , molle tamen & plicabile reddere non potuit , gelatinam quidem obtinuit , ut prius , vel jungendis vitris aptam , sed ebur mansit fragile. *G. Francus* ex *Plinio* de cornutis : Cornuum adeò sequax natura est , ut in ipsis viventium corporibus ferventi cerâ flectantur , atque incisa nascentium in diversas partes torqueantur , ut singulis capitibus quaterna fiant. Ut porrò , quod & ibidem legitur , in laminas secta transluceant , atque ita lumen inclusum latiùs fundant , item ut pectinis usum præstent , præparari , emolliri , diduci , explanari debent per proprios artifices , quos *Chr. Weigelius* in theatro vocat *die Hornrichter*. Adde alios ibi glutinum & pergamenæ membranæ &c. magistros ; vel & applica modum texendi naturæ analogum , quem inculcat *Helmontius filius* in paradoxis. Quâ occasione vel verbo facienda mentio *Rosæ* illius ex pergamento , quæ placuit *Bechero in der nârrischen weißheit* no. 28. cui subungere liceat similes flores non minus pulchros, ex ichthyocollâ per curiosiores inter nos foeminarum confici solitos.



XI. Gelatina testimonium præbet de regno *Animali*, remouet è minerali corpus, ex quo potest excoqui, tanquam ad illud non spectans: Non tamen vicissim, omne, quod nihil amplius gelatinæ præbet per cocturam, statim naturæ animalis esse vel fuisse negari potest, exemplo ossium calcinatorum manifesto. Hujus criterii usus fuit etiam in declarandâ dentium & ossium fossilium origine & naturâ, quæ præter alias, ex structurâ & mixturâ desumtas, rationes etiam hoc gelatinæ phænomeno ex dubiorum aduersorum copiâ protractâ, mineralium censui abjudicari, suo autem regno vendicari voluit; quod latius prosecutus est *Carl.* Vires autem illius *residui* ab extractâ vel in totum vel in tantum gelatinâ *pulueris*, s. cornuum & ossium ita præparatorum, meum modò non est prosequi. Remitto talium curiosos ad examen absorbentium, quod instituit *Langius* in disput. singul. & testimonium *Ludovici*, de vi ipsorum diaphoreticâ, cum parenthesi per omnem hanc doctrinam notabili: Aliam esse ignis, aliam stomachi resolutionem, vel remediorum inibi adaptationem. Interim ad analogiam gelatarum *Cnæffelius* scobem eboris cum aquâ sæpius in pastam contundendo & siccando, *Zwelferus* typhas cervi & viperas per lentam & repetitam phlegmatis abstractionem, præparare docuit. *Papinus* autem vi digestoris sui obtinuit massam, sapore & odore caseo similem, esui aptam, usui tamen medico necdum destinatam, nec mihi satis notam.

XII. *Lindanus* in select. med. exponit ambitiosum jus, seu *condituram*, quâ delitiosum jus fieret; ita enim græci pariter ac latini, ut ait, appellant ea, quæ fiunt affectato studio, enixâ operâ, ingenti sumtu, cuique omninò liceret parcere, & nihilominus satisfacere non tantum necessitati, sed & voluptati. *Ludovicus* quoque l. c. taxat juscula quorundam plus quàm Sybaritica. Me si quis audit velitve sequi,  
simplici



simplici gelatinâ contentus erit , pretiosa suis formulis , suis personis reservabit. Scil. *auri foliorum* drachmam cum capone pro destillatione per alembicum : Aut capones non nisi *viperis* pastos ad modum prolixum *Zwelferi* ; vel *ossicula cordis cervi* , quæ *Welschio* etiam nimis pretiosa , minus necessaria videbantur ; *typhas* item vel tenella cornuum germina , in quibus tantam gratiam non invenit *P. Castellanus* de esu carni-um , ac magnates , & quæ , quia sanguine turgent , nec pulverem dant ita albicantem , uti adultiora cornua , nec gelatinam ita claram.

XIII. *Compositionis animalis* , id est gelatarum è farra-gine diversarum specierum & partium obtinendarum , speci-men suppetit in jussulis , quæ nescio an consumpta , an con-summata , *consumé* aut *consommé* , rectius dicuntur. An qua-si absoluta & perfecta , totam substantiam complexa ? An ob carnem , forti longâque coctione quasi consumptam ? Quic-quid sit de nomine , pro parandis ita compositis gelatinis car-nes accedunt duris partibus , & obtinetur crassior , satura magis , & pulposa consistentia. Basin communiter constituit *capo* probè contusus & confractus , cum *carne* vitulinâ , bovil-lâ , *ossa* cum rasuris cornuum , excoquuntur vase stanneo co-chleâ probè obturato. Aliàs jus galli junioris ad nutriendum , veteris ad abstergendum magis valet , juxta *Primerosium* in d. vulg. err. Apud *Mynsichtum* prostat decoctum galli antiqui farcinati ; In *Thes. Secr. Cur.* capo pomis borsdorfianis , sem. frigidis , herbisque similibus repletus ; A *Lancisio* ad stoma-chi languorem commendatur jus pipionis turratilis , in cujus ventre *sassafras* , visc. quern. cum rad. & herb. deobstruenti-bus , stomachicis , & cephalicis fuerat inclusum. Pro tabi-dis ex morbo gallico mirabile putavit se publicasse *Septalius*. *Cancros* gelatinosæ substantiæ jungere docuit *Sachsus* in gam-marolog. quales gelatinas ex cancris fluviatilibus , cum car-nibus



nibus & cornibus animalium paratas, laudat inprimis *Exc. Dn. D. Zellerus* in disp. de Phthisi; Et jusulum gammarorum heticis præcipuè commendat *Fullerus*. Ne verò quicquam videatur omissum, addunt insuper hodie etiam *Cochleas*.

XIV. Componendi succos *animales & vegetabiles* modus occurrit præcipuè triplex. Præter modò dictam caponis farduram, rasuris ordinariis accedunt *herbæ, flores, radices*, morbo convenire creditæ, & simul excoctam ita gelatinam sistunt compositam: Formula prostat in d. compos. medic. *Königii*. Circa quales habendam modò putem duarum circumstantiarum rationem: Scil. ut servetur pro posse gratia huic formulæ, quâ se commendant gelatinæ, ne oriatur ex multiplicatione ingredientium nauseosa qualitas; Certè nec ad palatum solent esse tales, nec stomachus illis est ita ferendo. Dein, simul ista coqui non est consultum, quin potius duris, longam fortemque coctionem requirentibus, molliores herbæ demum addantur sub finem. Aliis convenientior videtur modus gelatinam dissolvendi & sumendi in & cum *jusculo*, herbis, sicuti opus fuerit, singulis vicibus recenter *alterato*, aut cum uno alterove cochleari *succi expressi*. Qualium jusculorum laudes hîc non prosequar, sed remittam potius B. L. talium cupidum ad dissertationes, quas reliquit *Præsidis B. Avus*, in specie illam de *casu, in quo menses p. n. emanantes per menagoga ciendi non sunt*, & alteram de *cardialgia*; imò recentius ad *Curas Riedlini*. Propius tandem accedit moderno mori gelatinas vegetabilibus sociandi ille modus, qui solvit ipsas in herbarum siccarum, *theæ* aut similium, *infuso*, tenuive *decocto* solidiorum radicum, lignorum, chinæ, *sarsæparillæ* &c. quocunque. An ita *Willius* in regn. anim. *Kænigii* scorbuticis commendat gelatinam cornu cervi cum trifolio fibrino? Uti-que combinationis hujus specimen præbere poterit triga illa *J. Franco* laudata, scil. idem hoc trifolium fibr. *veronica & alleluja*,



alleluja , nam multis conveniunt indicationibus. Huc omnino spectat , quippe novum usurpandi gelatinas modum , & combinationis succi animalis atque vegetabilis specimen suppetat , quod felici successu tentavit , & quia profuisse expertus est , aliis quoque non semel commendavit *Præses* ; Scilicet *cremorem hordei* , non salitum , benè excoctum , cum simplici *gelatinâ* cervino- eboraceâ singulis cibi porrigendi temporibus recenter permixtum , exhibere jussit infantibus materno lacte non enutritis ( quales *wasser-kindlein* vocantur à nostratibus ) sub vaccino autem lacte & pulticulis indè paratis non proficientibus , quin ferè contabescantibus. Certè non tulerunt modò facile novam hanc pulticulæ æmulam cibi speciem , sed & citò profecerunt melius , ut brevi pinguescere inciperent feliciter.

XV. Ulterius condiri solent gelatinæ multis modis , quos etiam paucis tangam. *Sal* quidem communiter excluditur ( nisi ex §. 17. cum carne suillâ mensis frigidis inferri soleat ) & gelatina , quia insipida , usurpatur , laudatur ac falsedini opponitur ; Ad imitationem ferè puerperarum quarundam inter nos , quibus solenne est , abstinendo ab aliis , solo tenui gallinaceo jusculo non vel vix salito , per primos à partu dies se non modò sustentare , sed & præservare à gravioribus symptomatibus. *Saccharum* , syrupos , conservas , & similia dulcia , pro condiendis gelatinis usurpari solita , an superfluis , an nocivis accensebo ? Non exprobrabo suas delicatis addi cupedias , qui sacchari usum in ægrorum diætâ & pharmaciâ non absolutè reformido , pro quo militat imprimis *Becherus* in *Psychosoph.* & recentior *Frid. Slare* in apologiâ pro saccharo : *Mortonus* specialem exceptionem habet in phthisi , ubi gelatinas palato gratiores fieri concedit , addendo tempore usûs syrupum melissæ , caryophyll. rub. id. aurant. limon. &c. addit tamen , tales non adeò benè gelatinis convenire , quoniam

G

niam



niam quadantenus vires earundem frangant. Ita dulci succedit vel jungitur condimentum acidum , laudatus alibi *succus citri* , vulgò *acetum* , Ludovico etiam *spiritus aciduli*. Huo ergo illud *Wedelii* : Dulcis ad confortandum , tussim ac raucedinem asperæ arteriæ magis expetitur ; acida ad refrigerandum ; unde non promiscuè sunt usurpandæ. Adde aphor. nov. 13. sect. 2. *Sponii* : Aceti aciditas biliosis magis , quàm melancholicis confert. Mulieribus autem acetum longè magis adversum est , quàm viris. De cætero durabilior etiam est clara talis & acidula galreda , nec ita citò properat ad mutationem. Aliàs sperma ranarum in aquam resolutum à corruptione per alumen præservat *Zwelferus*. Modico etiam aluminis aquam glutine tinctam diutissimè à putredine præservavit scriniarius apud *Becherum* in Phys. subterr. Jusculis consummatis porrò sub finem coctionis *vinum generosum* addit *Mortonus* & *Fullerus* ; uti *passulas* alii incoquunt. Similiter accedunt *aromata* , pro condimentis frigidiorum ; vulgo frustum zingiberis sufficit ; macis , nux moschata , cinamomum , citri & aurantii cortices novas afferunt facultates , præterquam quòd palato melius sapiunt. *Crocus* non colorem modò largitur , sed & virtutem. Transeant tincturæ aliæ. An *bacca phytolacæ* huic scopo convenient , vel potius sint salubres , non noxiæ , dubitare finit *Rajus* in Suppl. Granis Chermes pro confectiōe alkermes ipsas malè substitui monuit *Præsidis B. Parens* in E. N. C. D. II. A. VI.

XVI. Non vult componi gelatina cum propriâ suâ *pinguedine* , sed hanc respuit & excludit , si vel ex medullâ contusorum caponum , vel conquassatorum pedum jusculo accesserit & supernatet , nisi oris flatu fuerit depulsa , uterque liquor concrefcit suo modo , ille in gelatinam , hic in axungiam. Communiter macræ , ut sic loquar , hauriuntur gelatinæ , quia non rarò sumuntur frigidæ , ubi pingue concretum foret naufex.



sex. *Baglivus* oleum amygdalarum & gelatinas plerumque simul proponit. An ergò servari & simul usurpari proprium illud pingue, aut substitui aliud animale vel vegetabile, & in quibus casibus, juvabit? Sunt hinc indè per familias unguenta potabilia, quæ vel rubor, vel viror insignit. Poscit fervidum jusculum pro vehiculo sperma ceti. Modò ne pingua stomachum offendant, aut quorundam facultatem discretivam singulari modo exerceant, quale in *Cicut. Aq. Wepferi* de hypochondriaco prostat exemplum; quanquam & hoc fine soleat aliàs dari oleum, scil. ad procurandum vomitum.

XVII. Mollis hæc glacies, calore liquabilis, & aquâ solubilis, commodè ita hauritur *calidè*, interdum quibusdam sola, melius in & cum jusculo quocunque. Paucae erunt ciborum coctorum formulæ, s. lubricæ, tenuis, s. crassioris consistentiæ, quæ salubre tale accessorium non admittant, secumque deferant, ipsæ etiam illæ panatellæ *Helmontii*, de quibus statim; Exemplum hoc esse poterit fraudis medicæ salutaris, quippe quam ignarus subesse vix suspicatur, quia gustui sapor gelatinas non prodit. Quanquam autem actualis humidi calor faveat tali substantiæ resolvendæ & distribuendæ, habeatque pro se rationes omnium, qui calidos hodiè potus amant: Aliis tamen magis ad palatum est galreda *frigida*, & convenientior interdum creditur ipsius non solutæ sed frigidulæ usus, quia citò satis in stomacho, quin ore statim sponte solvitur. Ita vulgò mensæ secundæ infertur gelatina extremitatum suillarum, pauco sale & aceto atque aromatibus condita, de quibus *Castellanus* l. c. pedes, rostra, aures, vescidæ sunt, parum nutriunt, & facilè descendunt; Et ex *Simeone Zethi*: Pedes utiles sunt & boni succi, facilè enim concoquuntur, quapropter se ex morbo reficientibus idonei sunt. Scilicet suillam veteres Medici laudarunt communiter. Alibi dulcacidæ gratiores & pulchriores galredæ, cavo citri vel aurantii cortice exceptæ,



& variis coloribus insuper tinctæ, vel per ipsos oculos invitant convivas. Hujus modò loci est blandus ille in primo corporis nostri limine frigoris sensus; Nam similiter *Schelhammerus* de fero sanguinis humani, vitulini, porcini, quod laudat hec-  
tîcis, ita: Bibatur frigidum & crudum, nisi nauseet æger. Et quid sunt *aquæ* sic dictæ *resumptivæ*, in phthisi & atrophîâ aliàs commendari solitæ, vel decocta cornu cervi, non ulti, sed raspati, & similium rasurarum, ad febres & spas-  
mos, aut in decocto balsamico, edulcorante, &c. Ful-  
leri, quàm gelatinæ tenues frigidè hauriendæ, quæ τὸ γλιχρὸν  
& sal volatile gelatinarum possident, prouti ostendit in Eteo-  
dromi sui mense martio *Exc. Dn. Lentilius*, qui paulò ante  
phthifico emulsionem amygdalarum dulcium cum liquefactâ  
caponis gelatinâ parandam non sine fructu præscripserat. Ita  
*Primerosius* l. c. potus frigidos febricitantibus placere magis &  
prodesse voluit; Et *Helmontius*, aliàs calidorum potentiâ ta-  
lium patronus, pro cibo febrientibus apto, panem cum aquâ  
coctum in collam, cui tenuis cerevisia vino nupta accesser-  
rit, frigidè sumi jubet, ulterius coqui vetat. Inverso more  
acidulæ olim frigidæ nunc passim bibuntur calidæ. Famosa  
verò ptisana cichoraceo-avenacea quando frigidè, quando  
calidè sit haurienda, deliberationi medicæ relinquitur.

XIIX. Nefas foret, prætermittere aut subticere, quæ  
*adversus* gelatinas hinc inde vel inveni, vel audiui, undè si-  
bi regulas cautelasque practicas eruet rerum suarum sata-  
gens. *Abhorreo in febre jura carniûm, affatim nutrientia, juscu-  
la consummata*, scribit *Helmontius* loco non uno, nam ex-  
templo natura detestatur eadem; caro enim, pisces, ova, &  
juscûla facilè tum *cadaverantur*, ac minimè nutriunt; nego-  
tium febrili stomacho, nauseas, everfiones aliasque molestias  
parant, idcirco etiam cum excrementis se jungunt, & seque-  
strantur, postquam exhibuerint omnes anxietates: Secundum  
illud



illud Hippocratis: Corpora impura (qualia febrientium, quibus stomachi nidorosi, quibusque bonum, supervenire ructus acidus: ) quò plus nutris, eò magis lædis. Solis itaque potabilibus alendum vult ægrum, quæ humectant, solantur, fiti calori que satis dant, ariditates, ac debilitates indè consequentes arcant; denique acida commendat, scilicet illud vitrioli, nitri, citri, atque simil., An ergò gelatina, quò purior, tenuior, acidisque temperata, eò melior? Uti *Screta* in febre castrensi, diætam ægris præscribens, laudat gelu galinaceum, succo citri ubertim conditum; quo & cremorem hordei gratiorem reddi monet: Ubi tamen iterum, occasione ptisanæ Hippocratis, raro consensu Galenus & Helmontius hordei decocta cruda flatulenta minus probant, quos etiam sequitur *Etmüllerus* d. præscr. form. Cæterum ad victum illum in acutis refer investivam *C. Hofmanni* ex *Jacch.* in *prax. med. Gal.* contra insolentiores mulieres in turbando illo: *Cibant manè & vesperi, mediâ die & nocte, &c. Er muß ja eine Krafft haben! dicunt.* Adde aphor. ex *Fundam. Med. Fr. Hoffmanni*: *Omnia alimenta substantifica, pingua, juscula sic dicta confortantia, nimium sumta, nocent in omnibus febribus, præsertim circa crisin.* Ad istam verò aversionem appetitûs à carnibus promptam atque maturam, & tardissimam ad illarum tolerantiam reversionem provocat quoque *Stahlius* in physiologiâ, notatque chylum ex animali mixtione oriundum, ad corruptionem putredinosam proclivem, fovere periculum putredinis, quod in morbis fastidio illo quasi cavetur; præfert igitur vegetabilem, inprimis moderatæ acescentiæ capacem, chylum.

XIX. Iterum *Helmontius*: Infirmus, longo morbo extenuatus, etiam post adolescentiam convalescens, facilè pristinum carnis statum resumit: At non proinde, qui vitio cujusdam visceris emaciatus est, similiter ad priorem statum resur-



git. Hæcque est *tabis* sanandæ intestinorumque ulcerum medelæ difficultas. Qui hanc febrium hæcticarum causam urfit & inculcavit *Screta*, obsignavit tamen remediorum ipsi oppositorum classem glutinantibus, sale volatili turgidis, in quorum censu eminet ex cornu cervi confectum jusculum gelatum. Sed de notabili hæcticæ & lentæ tabificæ febrium distinctione si quis plura desideret, evolvat positionum inauguralium tertiam *B. Dn. D. Gerlachii*. quas habuit olim sub *Præsidis B. Avò*; & cap. 4. disp. de *Febribus*, quam sub *Præsidis B. Parente* habuit *Dn. D. Screta*. Qui volet ex *Praxi Med. Gal.* etiam hoc legat *C. Hofmanni*: Audias vulgo quiritantes quosdam analepticæ subditos, superest mihi aliquid febriculæ, nec possum defungi. Dic tu, medicaster, Siles? Tu non usus es vero & adæquato contrario simili, ideò flammam nondum extinxisti. Siccitas adhuc hæret ossibus imis. In febribus itaque non satis est, si calor extinguatur, oportet etiam curetur siccitas.

XX. Qui acutorum symptomata ferocientia mitescere præscriptis acidis vegetabilium, anodynis & emollientibus remediis scripsit, *Baglivus* d. fibr. motr. Idem promiscuum, nimium, imprudentem non modò olei amygdalarum, sed & gelatinæ atque lactis usum taxat, in casu *relaxati* nimium & enervati solidorum *toni*; nimio juris usu, similiumque laxantium abusu, *febres* transire in suas *mesentericas*, occultas, difficiles, ab erroribus diætæ methodique talis oriri cachexiam, hydropes, asthmatum & apoplexiæ frequentiam prætendit. Pluribus, qui è morbo convalescunt, familiarem esse *alvi segnitiam*, dum adhuc jusculis aliisque tenuibus cibis vescuntur, ex *Beverovicio* ad aph. 7. S. 2. notat *Schraderus*; simulac verò diætam solidiorem subeunt, mox quoque alvum solidiorem reddi, quòd præbeatur sic materia fæcum, quæ ex victu tenui non poterat remanere. Huic ad latus ponam illud nostris paradoxum ex *Pri-merosio* d. vulg. err. Juscula remorari purgationem.

XXI. Quanti sit, negligere aphorismos 5. 1. 18. 2. & avi-



*tum morem*, quàm necesse rationem habere nationum, regionum, &c. *Wigandus* d. Philiatr. itin. docet exemplo infantis, robusti satis, quippe germano creti heroe, nutrici gallicæ malè concrediti, quippe quæ, posthabitâ virium ratione, puerulum meris gelatinis delicatissimisque jusculis, nimis parcâ manu alere conata, fame perire passâ est. Infantibus & pueris nostras gelatinas in morbis, præter dictos & dicendos, tam epidemiis, e.g. tussi convulsivâ, quàm chronicis e.g. cardiacâ, rachitide, proficuas fuisse ubere exemplorum copiâ constat. Et experiuntur utique etiam adulti, appetitum redire vel augeri à gelatinis, non modò subacidis, quæ videri possent analogæ fermento stomachi, ubi acidum domi, sed & simplicioribus, quæ eluunt fortè quod obstat, & restituunt naturæ suum vigorem, ut & stimulus agendi, & organum percipiendi libertatem reacquirat. Hoc, quod in laude ponitur gelatinis, in adversum rapiunt alii, metuentes, ne vel *stomachus* sub illarum usu assuescat *mollibus*, impar futurus in posterum solidis, vel fame invitatus delinquat in quanto aut quali, & labatur indè iterum in pejus, ad novas porrò recidivas. Juvat habere attentam ad talia mentem, inprimis apud illos, quales audiavi, qui de *passione* & ægrimoniâ nescio quâ *præcordiali* sub illarum usu solent conqueri, quam per sensum inanitatis & infirmitatis, cui compatiatur etiam caput, solent exprimere, ut à tenui gelatinâ, mane in jusculo sumtâ, ad prandium ægrè vel non durare possint teneriores quidam valetudinariorum, quos saturat, sustentat & confirmat gelatina ex §. 13. magis composita. Aliàs *Schraderus* l. c. spissiora juscula, amygdalata, ventrem languidum magis offendunt, difficilioris sunt distributionis, quàm ptisanæ tenuiores.

XXII. Si gelatinis *intestina inviscare* referret, eboraceâ profectò præsentiozem haberemus cervinam: sic alicubi *Ludovici*. Atqui videtur referre interdum. Tam acris causa, quàm  
nuda



nuda pars, viscidum conveniens postulant. Tale plebi pauperculæ evporiston sit jusculum, passim laudatum, capitis vervecini, quod non modò demulcebit passiones intestinorum dysentericis enema, sed & pro potu haustum. Facultatem autem glutinandi non ita indiscriminatim gelatinis esse magnam, sed in iis magnam potius esse differentiam, supra jam notavimus ex *Papino*, & notant adhuc vel bibliopecti, qui gluten pergamenæ ovillæ præ-vitulinæ illo multò minus efficax asserunt. Illud verò potissimum videtur, quòd sensus de noxâ inviscationis apud tales, qui gelatinas diu multumque hauserunt, adeò non testetur, ut omninò ipsas in eis benè resolvi concludendum sit. Cæterum non ignoro, cur viscidum metuant multi; scil. quia cum acido classem causarum morbificarum ipsis absolvit: Sed & novi, esse alios, qui passim prætendunt, ea non sufficere. Apud *Etmüllerum* in med. theor. & pr. non solum viscidum peccat, sed & in aliis falsum, acre, serosum, quod inter alia per talia gelatinosa corrigi postulat. Dari autem casus, in quibus præ nimis tenui infuso theæ viscidior illa gelatinarum substantia conducit, docuit *Præsidis Patruus*, Exc. Dn. D. *Elias Camerarius* in diss. tert. cap. tert. Suum ergò cuique temperiei & cruditati tribuere norit Medicus.

XXIII. Inter ea, quæ porrò adversus gelatinas ex discursu sparsim hausi dubiâ, illud unum è potioribus videbatur, quo *insufficientia* voluit argui gelatinarum usus. In quâ quidem agnoscendâ non ero difficilis, quippe quam cum aliis remediis ferè communem habent, quorum pauca usurpantur sola, pleraque vel con- vel subjunguntur, quod ipsum prudentiæ medicæ vel maximè commendatum esto. Modò menti jugiter obversetur medendi methodus, quæ anima praxeos audit *Præsidis B. Avo* in disp. de *Indic. Sympt.* Ita siquidem gelatina sola locum aliqui & aliquandò habere velit, vel possit sufficere, quibus tamen id non placet, vel minus tutum videtur, alia intermisceat; modò



modò quæ conveniunt , nec pervertunt quod ab istis speratur boni. Quòd enim gelatinæ benè possint simul stare cum aliis laude dignis remediis, quòd ea invicem non sint incompatibilia, exempla docebunt. Si alterari & nutriri corpus ægrum commodè posse non videatur , nisi præviâ *purgatione* , fiat id cum debitis cautelis. Si prospicere in futurum , & consulere recidivas febrium metuentibus videatur necesse , quid vetat simul usurpare famosum *Corticem* , suis scil. horis medicis , & sub cautelis non minus necessariis ; Nam grande hoc è Per nobis à Deo missum beneficium veneror , non contemno, dextrè modò & prudenter usurpari volo. Si condire qs. *Nitro* gelatinam orgasinus postulet , aut sub hâc mordax occultare nitrum placeat , deducendum ita tutiùs ad partes demulcendas aut temperandas , commodè id fieri posse constat ex Dispp. quas sub *Præsidis B. Parente* habuerunt duo nunc vicini, sc. Heydenhemii & in Imperiali Giengâ Physici , *Dn. D. Planerus* d. Ustilag. Frum. & *Dn. Lic. Brodbeck* de Nitro inaug. Si ante & post pastum *elixir aperitivum* cum *tinctura martis cydoniata* & *species diacretæ* hypochondriacis , aut in paroxysmis nitrosi pulveres , ad noctem *theriacale* quid videatur dandum, non repugnabunt gelatinæ. Idem esto iudicium de aliis , de *lacte* ipso , quod secundum regulas medicas usurpatum multas multorum laudes meruit : Equidem, quod lac erit , & lympa est , id gelatina fuit , scil. nutrimentum corporis. Non dicam in morbis longis solere , imò debere , fieri transitum ab uno ad alterum , & per examina comparando attentè manifestum fore, quid laudis pro diversitate temporum vel personarum huic vel illi , utrique vel alterutri remedio sittribuendum : Illud modò ponam , paucis præmissis , simultaneum lactis & gelatinæ , sc. illius caprilli, vel vaccini etiam , saccharati manè, hujus cervinæ & eboracæ ad vesperam , usum oppidò benè cellisse fœminæ nocturnis sudoribus , ardoribus doloribusque

D

præcor-



præcordialibus, diu admodum vexatæ & multum consumptæ. Cæterum nec desunt, qui gelatinas cum lacte aut emulsione amygdalarum ad crassiusculam consistentiam componunt & delicatis commendant; Ita *Zwelferus* caponis gelatinâ, amygdalis minutim confcissis refertâ, saccharo & aromatibus conditâ, utero gerentem reficit. *Fullerus* quoque suum *cibum album* eodem ferè modo parare docet, atque tabidis pro refectione commendat. Nec desunt inter nos feminæ, quæ suis infantum pulticulis gelatinas miscuerunt cum fructu.

XXIV. Fuerunt etiam, qui commissam ferè *fallaciam non causæ ut causæ* voluissent oggerere, quasi verò illud juvisse dicatur, quod ultimò fuit usurpatum. Hoc vix concessero in casibus, quos diligenter me observasse prætendo. Habenda utique est ratio prius assumptorum, nec nulla est, quæ tarda venit, quorundam efficacia. De juvantibus tamen & nocentibus quis prior aut potior testis erit audiendus ipso ægro, de cuius proprio sensu agitur, modò ipse & Medicus ad omnes circumstantias probè attendat: Ita se prodet discrimen juvantium & nocentium, aut frustraneorum. Interim, ut dictum, qui laudes hujus vel illius sibi probati remedii proponit expertus *Rupertus*, variè prius jactatus & vexatus, non eo ipso præjudicat aliis, quæ aliàs & alibi fortè suam quoque merentur laudem. Tandem verò doctrinam de Imputatione Medicâ, tanquam generaliore & majoris momenti, aliis relinquo.

XXV. Minoris autem momenti erat illud dubium, quod alii movebant, quibus medicamentum dicebatur requiri in morbis, non sufficere *alimentum*; Spectare gelatinas ad diætâ, non ad pharmaciam. Iterum, quisquis morbos plures paucioresve & abstinentiâ, & legitimo rerum non naturalium usu, vel præcavere vel curare poterit, præterquam quòd medicamenta fastidientibus rem faceret gratissimam, næ is laudem potius merebitur, quàm reprehensionem. Interim  
illis



illis fortè sati fiet, dicendo, gelatinam esse cibum medicamentosum.

XXVI. Nec illud me movet, quò minus pergam in commendandis gelatinis, aut ut ab istis abstraham, quòd præparatio ipfarum sit nimis vulgata, communis, remedium adeò vile, *Galenicum*, non Chymicum, cui parando sufficeret muliercula, & cujus artem sibi vendicent seu melius calleant coqui. Nam evporista me defensore non egent. Causam autem Galenicorum medicamentorum, tanquam Chymicis præstantiorum, egit *Bohnius* singulari disputatione. Nec tamen refragabor, si quis mea hæc referre velit ad prophetias muliebres in Mythol. Sacr. J. V. *Andrea*, ubi in jusculis sorbitiunculisque parandis fœminarum enitere sapientiam falsè scribit pro more.

XXVII. Quibus ita se habentibus nunc in laudem quoque gelatinarum specialiora Practicorum quorundam testimonia, in quæ ista meditabundus incidi, paucis excerpere, atque ita coronidem imponere disputationi liceat. *G. H. Welschius* dec. 3. cur. 2. (præterquam, quòd catalogum Auctorum habeat, qui de usu & laudibus cornu cervi scripserunt) gelatinam ejus commendat, tanquam singulare ἀγξίπυρετόν καὶ ζυμοσπικτόν remedium, sibi sæpius expertum, hinc dedit ad præoccupandum paroxysmum, eumque indè leviolem, breviolem, cum copioso sudore finitum observavit; Sed cum aceto rosarum, antimonio diaphoretico, & syrupo limonum. *Moræus* autem in febrium paroxysmis gelatinas ita cervi & ribium conjunxit. Inter primas Lineas *Riedlini* est illa 19. jun. anni primi, quam destinavit laudibus gelatinæ cornu cervi, spiritui hujus tantum non æquiparandæ, ut ait. Ex morbo longo & graviore convalescentibus, præcipuè hecticis, etiam desperatis commendat, qui talibus haud parvum solamen attulisse observavit. In Actis *Nat. Cur. Uratislaviensium* ann. 99. *C. Helwich* profitetur; se frequenter usum esse gelatinis accommodatis; & illis à *Wepfero* ordinatis ferè æmulis, in dysenteriâ: *Secreta* l. c. cap. d. dysent. in coquendo jure bubulo gallinaceo, agnino, semper de ichthyocollâ ℥ij. ollæ indantur, de quo postmodum subinde horis medicis aliquot cochlearia præbeantur. *Baglivus* in apparatu variolarum fervorem & impetum sanguinis, inflammationes viscerum minantem, ut coërceat, naturæ motum adjuvet, præter & inter alia gelatinam



cornu cervi, tanquam lene diaphoreticum, usurpat. Idem gelat. cornu cervi valdè suavem per intervalla dedit *colico*; utique colicæ nostratî olim s. spasmodicæ s. saturninæ conveniens remedium; & in casu suppressorum mensium à stricturâ solidi, & fibrarum exsiccatione, molliori potius & laxari vult istam per talia, qualium in censu est gelatina cornu cervi, quàm per acria & volatilia malè tractari; planè ad regulam, quàm in disp. sup. alleg. d. cas. quo menses &c. dedit olim *Præsidis B. Avus*, qui alibi, sc. in disp. c. t. *Obex Curat.* contra aphthas partium internarum, frequentius, quàm vulgò putatur, dolorum internorum causas, feliciter per mensem & ultra exhibitam cum aliis gelatinam cervino-eboraceam laudavit. *Lancisius* d. mort. subitan. inter remedia, quæ illo anno illis maximè in curationum progressu profuerunt, qui à morbis istas minantibus evaserunt, numerat illa omnia, quæ aquoso fluido laxantè ac temperato redundant, jura, succos, emulsiones, gelatinas, quæ nimirum tum sales acres & sulphureos temperare, diluere atque irretite, tum vel maximè convulsas alicubi vasorum fibras laxare valent. Et quid multa? cur peregrinis inhio, cum suppetant domestica? Quod enim de *B. Wepfero* in *App. E. N. C. III. 3.* scripsit Ipsius gener, *Illustr. Baro de Brunn*, quòd nimirum Ille variis frustra tentatis, tandem ad incitas redactus, senex, difficili anhelitu afflictus, solius gelatinæ cornu cervi usui inhæserit, & diætæ studuerit unicè, nec id sine fructu, scilicet morbo quidem non sublato, delenito tamen, & vitâ utcunque melius protractâ; Idem de *Parente suo desideratissimo*, Professore & Præceptore quondam de Academia hâc atque Auditoribus suis benè merito, ingenue fatetur *Præses meus*, Ipsum diu infirmum valdè & tussiculosum, tandem ab hæmoptoë phthisicum atque lentè tabescentem, per integrum ferè lustrum, si non ultra, solo gelatinarum usu & diætæ observantiâ, absque magno medicamentorum apparatu, semet sustentasse. Quemadmodum igitur geminum hoc exemplum sistit nobis *Medicum* simul *agrotum*, qui proin juxta §. 24. de proprio sensu & juvantibus atque nocentibus aut frustraneis testis erit omni exceptione major; Ita licebit etiam eò confidentiùs ad hæc provocare, & in hisce nunc acquiescere.

SOLI DEO GLORIA.